

Tutu e táxnūu San Pablu iña ñá ñuú Colosa

Taxnūu Pablu tutú iña ñá ntoo ñuú Colosa

¹ Xu'u é Pablú u ne, pustru iña Jesúcrístú u, tsí kuan o ntío Xuva kō. Ntuví ntí ení ko Timoteú ne, ² taxnūu ntí tutú sá'á iña ña ntákuinti'xe i Xuva ko nī Cristu, ñá ntoo ñuú Colosa. Na naxnuu viko Xuva ko ntō. Na tā'xi ña é kuntōo vá'a nto.

Kaka'an ntâ'ví Pablu iña ña ntákuinti'xe i san

³ Utén uten da ntáka'an ntâ'ví ntí ne, ntánakué'e ntí sintiá'vi kuenta iña nto nta'a Xuva ko, Uvā Tó'o ko Jesúcrístu. ⁴ Tékú ntí tsi dóo ntákuinti'xe nto Jesucristu, tsi dóo ntákuinima nto un ntíí ntíí ña'a, ña ntáduku ntée Xuva kō. ⁵ Ini nto tsi ntántétu nto é nī'i nto é ñū'u vá'a iña nto e dukún kân. É kūtuni nto iña i sá'a da téku nto tú'ún va'á san, tú'ún é nuu é ntaā i nté koo nakáku o. ⁶ Tū'ún san e téku nto ne, ñá te da dii ña'a ntákuinti'xe ña da mí'í ká ñuxiví san, vatā o dé nto da téku nto tú'ún e dóo kakuinima Xúva ko kō né, kūtuni nto tsí ñi'vi tū'un é nuu é ntaā i. ⁷ Sá'ā é kūtú've nto dá ká'an Éprafa, ña e dóo ntio ko, ña e dé tsiñu ni'í ntí. Ini nto tsí ña kaxtuví mii ña é nakuá'a ña nto iñá Cristu. ⁸ ñi'vi ña é kantaa ña nī ntí tsi dóo ntákuinima ntó ta'an nto vata o tá'xi Espiritū san é vii o.

⁹ Dukuān ne, váta tee dā'na ntí e ntáka'an ntâ'ví ntí kuenta iña nto nte ntúvi da téku ntí. Ntaíkan ntí te ta'xi Xuva kō é kūtuni nto nee iña e ntío ña é vii ntó, te tā'xi ña é kūtú've vá'a nto iña ña. ¹⁰ Ntaíkan ntí te vii ntó vatā o kantio é vii ña ntákuinti'xe i Tó'o kō sán, te ütén uten víi nto vatā o ntio ña. Kidāā ne, kadiá'vi nuu i é vā'a e ntáde nto ne, dií dií ka vá'a kiní nto Xuva kō. ¹¹ E dóo ió Xuva kō é vii ña é un ntí'í né, na natsu'un ká'xi ña nima ntó vatā koo é na kútíi nto é un ntí'í ne, ña natívi iní nto. ¹² E dóo ka'nu kuini ntó ne, nakué'e nto sintiá'vi nta'a Xuva kō, tsí

ntavá'a ña kō vata koo é kūvi ni'í ko iña ña e dukún kân dadîi ni un ntîî ntîî ña ntáduku ntée ña. ¹³ Tsi é nakáku Xuva ko kō dá ika ō mí'í dóo neé ne, ta'xî ña é kuntoo dadîi o ni l'xā ña, ña e dóo ntio ña. ¹⁴ Tsi nakáku ña kō dá xi'í ñá kuenta iña kó ne, dē ka'nu iní ña ni kō kuetsí kō.

Kuntōo vá'a o ni Xuva kō, tsí xi'í Cristu kuénta iña ko

¹⁵ Ña kúvi kiní o Xuva kō. Dukuān né, taxnūu ña l'xā ña vata koo é kīni o nté kaa ña. Di'na ña tuví ña e é un ntî'î é ió. ¹⁶ Kuenta iñá Cristú ne, dē kú've Xuva kō é un ntî'î, da neé ka é ió e dukún kân, da neé ka é ió ñuxiví sa, é un ntî'î é kuyi kini o nî é un ntî'î é ña kuyi kiní ō. Dē kú've ñá un ntîî ntîî espíritū e ntáde kú've. É un ntî'î de kú've ñá kuenta iña Cristú ne, ni iña ñá di. ¹⁷ Nté di'na tuví Cristu é un ntî'î né, divi ñā kade ña kuenta é un ntî'î. ¹⁸ Ña ntákuinti'xe i sán ne, vata kaa kúñu ñā ntáa ña. Divi ñā ne, vata kaa dikí í iña kúñu ñā san kaa ña. Tsí dukuān tuví ña dá iñi ntu'ū ne, di'na ña ntóto ña dá xi'í ñá, vata koo é divi ña kodo nuū ña é un ntî'î. ¹⁹ Ntio Xuva kō é koo dadîi iña ñá ni l'xā ña. ²⁰ Ntio Xuva kō é kuntoo vá'a é un ntî'î é de kú've ña kuenta iña Cristu é xi'í ñá ntiká krusi kan, é un ntî'î, kuān té ñuxiví sa tuví, kuān té e dukún kan tūvi.

²¹ Dí'nā ne, ñá ni iní ntó Xuva kō. Ña ni ntío kuē'en ntó ña, tsí da mií e dóo inchú'vi nto ña, tsi dóo kini o dé nto. Ntá tsi e náki'í Xuva ko nto ²² kuénta iñá Cristu dá xe'é ña kúñu ñā é kuyi ñá ntiká krusi kan. Kuan ō dé ña vata koo é kūvi nto iña mii ña, xoo é ña tuví ka kuetsí í, xoo é ña dentú ka nima i. ²³ Kantio é kuntikin va'á nto e ntákuinti'xe nto. Ñá ku nat'ivi iní nto. Ñá ku xtuví mii nto e ntákuinti'xe nto tú'ūn va'á san e téku nto. Tú'ūn sa'á ne, ntáka'an ntódo ña'a dá kaniñ ñuxiví san. Xu'u é Pablú u ne, divi tsíñu kade ú di.

Ntáde tsíñu Pablu ni ña ntákuinti'xe i

²⁴ Dōo diní ko tsí kanto'o kó kuenta iña nto, tsí du'vā ó kanto'o kó vatā o ntó'o Cristu kuénta iña ña ntákuinti'xe i. ²⁵ E tá'xi Xuva kō é káka'an ntódo u, é ká'án u ni nto ūn ntîî ntîî tú'ūn iña ña. ²⁶ Tā'xi ña é ká'án u ni ntó tú'ūn ña é tuví xu'u nte éma tsi, é ña ni tēkú ñata kō. Ntá tsi e tá'xi

Xuva ko vē é kūtuni ña ntákuinti'xe i ña. ²⁷ Ntio Xuva kō é kūtuni ñá'a, ña é ña te ña Israee, tsí ña te nté kaa va'á nuu i sá'a é tuvi xu'u. Sá'ā é tuvi xu'ú ne, kani tú'un tsí nuu Cristu nima nto. Dukuān ne, ntantétu nto nēe e dóo va'á iña nto nta'a Xuva kō.

²⁸ Ntáka'an ntódo ntí iñá Cristu. Ntaxé'e ntí itsi, ntánakuā'a ntí un ntíí ntíí ñá'a vata koo é kūtú'vē vá'a ñá'a san iñá Cristu. ²⁹ Dukuān ne, kade tsiñu ú, kaxió ntii ú vatā ó kata'xi Cristu é kūvi víi u.

2

¹ Ntio ko é kūtuni nto tsi dóo kaxio ntii ú kuenta iña nto, kuenta iña ña ntántoo ñuú Ladicea, kuénta iña ñá'a, ña é vata kiní nuú ko ñi. ² Ntio kó te kíi nima ñá, te kudadii ña ni tā'an ña tsi ntákuinima ñá ña. Tsí ni'i ña é vā'a kídaa tē kutú've vá'a ña, te kīni vá'a ña nuu i é tuvi xu'u iña Xuva ko, iñá Cristu. ³ Tsí nta'a ña vé'xi é un ntí'i nuū i é kutú've kō, é un ntí'i nuū i é kūtuni ko. ⁴ Kaka'án u sá'a ni ntō vata koo é ña kuvi kaní ntā'ví ñá'a san nto da dóo vá'ā ó kaka'an ñá, kuini nto. ⁵ Kuān té xoxó ntí'xe u, ntá tsi ikān tuví nimá ko ni ntō né, dóo diní ko da kūtuní ko tsi dóo vá'ā ó de nto, tsi ntákuinti'xe ntí'xe nto Cristu.

⁶ Dukuān né, vata ō kuinti'xe nto Tó'ó ko Jesūcristú ne, kuan tsi koo kuntikín ka ntó ña. ⁷ Kuinti'xe kue'en ntó ña, kutú've vá'a nto nté kui kakuinti'xe nto ña, vata tsí o nakuá'a ú nto ne, nakué'e nto sintiá'vi nta'a Xuva ko ūtén uten.

Ntuvi xee é nī'i ko nta'a Cristu

⁸ Koto nto tē ña ku ntíkin nto ña ntaéni nta'ví nto da ntáka'an ña nté ō ntádē kuení ña, da ntáka'an ñá dovéte. Tsí ña te ntántikín ñá Cristu, tsí da ntántikín ñá vata xkoó ini ñá'a. Ntántikín ña tú'un ña ñuxiví sa.

⁹ Tsí vata tsi kaa mii Xuva kō né, kuan tsí kaa Cristú ñi. ¹⁰ Divi ntō ne, ñá tē nté kaa nuu mé'ñu Xuva ko ntō tsi ntáduku ntée nto Cristu. Tsí ñi ña kadē kú've ñá iña un ntíí ntíí ñá'a, ña ntádē kú've. ¹¹ Vata tē te'nte kúñu ntō, ntá tsi ña te ñá'a ni e'nté ña nto. Vata tē nima nto é tē'nte da nakuíta nto kuétsi ntō da nakáku Cristu nto. ¹² Dā ítsi ntute nto ne, vata tē intú'xi dadíi nto ñi Cristú ne, ntoto

xtuku nto ni ñā dī, tsi kuínti'xe nto tsí kuvi víí Xuva ko nantōto ña ña rkontuvi dá xi'i ña. ¹³ Di'na ne, vata tē xi'i ntó kuenta iña kuétsi ntō, kuenta iña i é ña ni e'nté nto kúñu ntō. Ntá tsi tá'xi Xuva ko ntūvi iña nto dadíi ni Cristu vé ne, dē ka'nu iní ña ni ntō kuetsí nto. ¹⁴ Nakadí Xuva ko kuenta ko mí ūve na'a tsí ña ni de ntáa ō leí san. Xnteē ñá kuentá san ntiká krusi kan. ¹⁵ Dā xi'í Cristu ntíkā krusí san ne, kūvi dé ña ni ūn ntíí ntíí ña'a, ña é ña vá'a o ntádē kú've. Nánē'e Xúva ko kō tsí ña vá'a ña tsikan da kúvi dé ña ni ña ntiká krusi kan.

Nantuku nto nūu i iña Xuva ko

¹⁶ Dukuān ne, ñá ku dā vá'a nto é kā'an ntée ña'a san nto tē neé ntaé'xi nto, o tē nee ntáxi'i nto, o tē nee ntáde nto, o tē ña ntáde nto viko san dá kanakuntéku xoó san ne, ō dá ntuvi é iō dá'na. ¹⁷ É un ntí'i nūu i sá'a ne, vata kaa kudii ntati nuu i é kī'xi rkontuvi. Ntá tsi nuu i é nuu é ntāa ntí'xe i ne, Cristu. ¹⁸ Ná ku dā vá'a nto é nākunaa ña kini ntāa san nto, ña e dóo koñu'u kuini i, ña e ntaínuu ini i ánjē san, ña e dóo ntántaa nuu i e kéní ña, ña ntáde na'nu kuenta iña i e ntádē kuení mii ñā. ¹⁹ Ná tē ntántikin ntí'xe ña Cristu, ña é odo nūu iña ña ntákuinti'xe i san. Tsí Cristú ne, kata'xi ña é un ntí'í é kantio ko, xo'ō é kuvi ō kúñu ñā ne, kade ña é koo dadíi ō vata koo é kue'nu o vatā ó ntio Xuva kō.

²⁰ Ntō'ó ne, e xí'i nto nī Cristu kuénta iña i é ió ñuxiví sa. ¿Nté kuí ntákini nūu xtuku ntu nto nuu i tsíkan? ¿Nté kuí ntáde ntū nto vatā ó ntáka'an ñá'a ñuxiví sa? Tsi ntáka'an ña: ²¹ “Ná ku tññ nta'a sá'á tññ nta'a tsikān nto, ñá ku e'xi nto, tsi dóo xií kaa té kuān koo vii o”. Kuan ō ntáka'an ña. ²² Un ntíí ntíí nuu i sá'ā ne, kanti'i da ntáde tsiñu ni'í ō. Sá'ā né, kúdii dá mii tū'ún ña'a san. ²³ Nuu é ntaā i tsi dóo va'á, kuini ko, tsí vata tē ntántikin ña nchu'ún va'á, vata tē dóo ntaíko ñu'u ñā, vata te ña ntáde kuení ña kuenta iña mii ña. Ntá tsi ña kaidiá'vi kue'en tsi sá'ā e ntuvá'a nima káni ntáa kō.

3

¹ Tsí nto'o é ntoto dadii nto ni Cristú ne, nantuku nto nēe nuu i é kāduku ntée e dukún kán mí tuví Cristu díñi kua'a Xuva kō. ² Kadā kuení nto iña i é tuví e dukún kán; ñá ku dē kuení nto iña i é iō ñuxiví sa. ³ Tsi é xi'í ntó ni Cristú ne, é iō va'á ntuvi iña nto nta'a Xúva kō. ⁴ Tsí mii Cristu san kúvi ña ntūvi iña ko. Tē ntii díto ñá ne, dadii tsi ntii díto ntó ni ñá é kaxi'í nuu ka'nu ña.

Ntuvi ata iña kó ni ntuvi xēé iña ko

⁵ Nakuítá kue'en nto da nēé ka e ñu'u dukuān nima nto é kāduku ntée ñuxiví sa. Ná ku kīdi ni'í nto ñádī'í tē ñá tē ñádī'í míi nto. Ná vii nto é kīni kaa. Ná vii ntó nuu i é ña vá'a, nté nuu i é kadā kuení mii ntó é kaikan nima kīni kaa nto. Ná ku kūne'u iní nto ni tā'an nto, tsí vata te kanuu iní nto tuku xuva nto te kuān koo vii nto. ⁶ Ña é kuān ó ntáde sán ne, ní'í kue'en ña é nto'o ña nta'a Xuva kō, tsí ña te ntákuinti'xe ña ña. ⁷ Kuān o dé nto ntuvi di'na di. ⁸ Ntá tsi vevíi ne, nté uun ito nté uun ntuvi ká ña kú de nto nuu i sá'a: é kūdiin nto, é ña ntío kue'en ntó ta'an nto, é vii nto é kīni kaa, é kā'an kīni nto iña ta'an nto, é kā'an nto nuu i é ña vá'a. ⁹ Ná ka'ān ntó dovete ni tā'an nto, tsi é nakuíta nto nima kīni kaa nto ni un ntí'í nūu i é edé nto kídaā ne, ¹⁰ e ní'í nto nima xéé nto ve. Xuva kō ne, utén uten kantavá'a ña nima ko da nté ntuvá'a vata kaa mii ñā, da nté kuīnī va'a kó ña. ¹¹ Ñā té iní tē ña Israeé o, o te tuku ña'a o. Ñā té iní te tē'nte kúñu ko, o tē ña'a. Ñā té iní tē ña tuku ñuú o, kuān té ña tú've ko, kuān te ntaíka o má tsiñu ne, kuān te ntaíka xaa o, tsí Cristu é kaīnuu á'vi ña iña ko un ntí'í ntí'í ó ne, nuu mé'ñu ña ko ūn ntí'í ntí'í o.

¹² Dōó ntio Xuva ko ntó né, nākaxnúu ña nto vata koo é ntūvi nto iña ña. Dukuān ne, vii nto vatā ó ntio ña: ntuntá'ví iní nto ta'an nto; vii nto é vā'á ni ñā; ñá vii ka'nu nto; na kūtíi nima ntó ni ñā'a san; na kūtíi nto kuntētū nto nee é ntio nto. ¹³ Na kūtíi nto ni tā'an nto ne, kada ka'nu iní nto ni ña te iō nuu i. Vata o dé ka'nu iní Cristu ni ntó ne, kuan kōo kada ka'nu iní nto ni tā'an nto. ¹⁴ Díí ka vá'á ó ne, kuinima ntó ta'an nto, tsí da ntákuinima kó ta'an ko ne, uun tsi ntúvi o ni ñā. ¹⁵ Xuva ko na tā'xi ña é kuntōo

vá'a nto ne, nañē'e ñá nto nté koo víi nto, tsí ðivi tsiñu e kána ña nto é uun tsi ña'a kúvi nto. Nakué'e nto sintiá'vi nta'a Xuva kō.

¹⁶ Nguentúvi tsi na kunūu tú'ūn Cristú san nima nto. Nakuā'a nto ta'an nto ne, kué'e nto ña ĩtsi. Kata nto iña Xuva kō. Kata nto tsi dóo ka'nu ña. Kata nto nté ō dé ña ni ntō. ¹⁷ Da nēé ka é vii ntó, é ká'an ntó ne, kuān koo víi nto kuenta iña Cristú ne, nakué'e nto sintiá'vi nta'a Xuva ko kuēnta iña Tó'o kō.

Nté koo víi ña ntákuinti'xe i san

¹⁸ Ntō'ó ne, ñadī'i, kuinti'xe nto xii nto, tsí kuān ó ntio Tó'o kō é vii ña ntákuinti'xe i san. ¹⁹ Ntō'ó ne, ñatii, kuinima ntó ñadiī' nto. Ná ku kudīin ntó ni ñā.

²⁰ Ī'xá, na kuinti'xe nto é un nti'ī e ntáka'an úva nto ni dí'i ntō. Sá'ā é ntio Xuva kō é vii o. ²¹ Ntō'ó ne, uva ĩ'xá, ña kú de nto é na kúdiin i'xá nto vata koo é na kī'xi iní i é vii i é ntio nto.

²² Ntō'ó, ña ntáde tsiñu, kada ntaa nto é un nti'ī e ntáka'an tó'o ntō, ña ntoo ñuxiví sa, ñá te da mii tsí dá kaito ñā, tsí kanī nima ntó, tsi ntákuinti'xe nto Xuva kō.

²³ Da nēé ka nee é vii ntó ne, kanī nima ntó vii nto, vata te iña Tó'o ko káde nto, ñá te iña ña'a. ²⁴ Ini ntó tsi tá'xi Xuva ko nto iña ñá doméni, tsí kade tsiñu nto iña Cristu, ðivi ñā e Tó'o nti'xe ko ñā. ²⁵ Xoó ña'a é káde ña é kīni kaa ne, ní'i ñā é kīni kaa, tsí ña káde Xuva ko kuēnta te ka'nu ñá'a ña, o tē ña ka'nu ñá'a ña.

4

¹ Ntō'o e tó'o tsiñu kúvi nto ne, víi nto é vā'á nī ña ntáde tsiñu iña nto. Naka'an ntō tsí ĩo Tó'o ntō, ña é kadē kú've iña nto e dukún kán.

² Ná tee dā'na nto é ká'an ntá'víi nto. Ná kū xkukídi naá nto, ntá tsi nakué'e nto sintiá'vi nta'a Xuva kō. ³ Ka'an ntá'vī ntó iñá nti dī te ta'xi Xuva ko te kúvi ka'an ntódo nti tú'ūn va'á san iña ñá, te kúvi ka'án nti nuu i é tuvi xu'u iñá Cristu, tsí kuenta iña tú'ūn san é nuu kutū u. ⁴ Ka'an ntá'vī ntó te kúvi ka'an va'á u vata koo é tēku va'á ña'a san.

⁵ Koto nto é vii nto é vā'á ni ñā'a, ña ntákuinti'xe i san. Koo ntii nto kada tsiñu nto vevii é ió ka ntuvi. ⁶ Ka'an vá'a nto ni ñā'a san vata koo é nā xkúntee iní ña é kīni ña. Kutú've nto nté koo nantiko koō ntó ni ñā'á nēe é ntio ña kutuni ña.

I'a ntí'i tutú san

⁷ Ení ko Tīquicu, ña e dóo ntio kó ne, un vá'a tsi xntíi ñā ko. Dadii tsi ntáde tsiñu ntí ni ña iña Tó'o kō. Kuni'i ña tú'un iñá ko ve. ⁸ Tsi táxnūu ú ña vata koo é kā'an ñá ni ntō nté o de ntí, vata koo é na nāku'ún ka'nu nima nto. ⁹ Ntini'i ña Onēsimu, ña e dóo ntio ko, ña e dóo ini dé ntaa, ña é kāduku ntée ña nto. Ntaa ña ni ntō é un ntí'í é kākuví i'a.

¹⁰ Aristarcu, ña é ñu'u kutū ntí ni ī né, taxnūu ña ntiusi nto. Marcú di, ení Bernabee. É kākā'án u ni nto kuēnta iña ña. Te kī'in ña kikoto ní'ni ña ntō ne, vá'a kōo víi nto ni ñā. ¹¹ Jesuú, ña é nani Justó di ne, taxnūu ña ntiusi ntó di. Da mii ña sā'a é un ntí'í ntí ña Israee, ña ntákuinti'xe i san, dé tsiñu ntí ni ña iña Xuva ko. Dōo nāxnūu ka'nu ña nimá ko. ¹² Eprafa, ña é ñuú nto, ña é kade tsiñu iñá Cristú ne, taxnūu ña ntiusi ntó di. Utén utén kaka'an ntá'ví ña iña nto é kuntikin xntó Xuva kō, é kanī nima ntó víi nto é ntio Xuva kō. ¹³ Xu'ú ka'an ntaa ú tsi dóo kadē kuení Eprafá san kuenta iña nto, ña ntoo ñuú Ladicea ni ñá ntoo ñuú Hierapolí di. ¹⁴ Luca, ña medíkū e dóo ntio kó ne, taxnūu ña ntiusi nto, ní Demá di.

¹⁵ Ká'an ntō ntiusi ní ña ntákuinti'xe i, ña ntoo ñuú Ladicea. Ká'an ntō ntiusi ní Nifá, nī ña ntákuinti'xe i sán di, ña ntánataká nuu nú vi'i ña kán. ¹⁶ Tē kúvi nakuā'a nto tutú sa'á ne, taxnūu nto ñuú Ladicea, na nakuā'a ña ntákuinti'xe i, ñá ntoo ikán, di. Nakuā'a nto tutu e táxnūu ú iña ñá di. ¹⁷ Ká'an nto ni Arquipú te na kōto ñá te káda ntaa ña tsiñu é tēé tsiñu Xuva ko ñā.

¹⁸ Xu'u é Pablú u ne, nta'a mií kó kaka'u u é taxnūu ú ntiusi ntó di. Naka'án ká nto tsí nuu kutú u. Kūnuu mé'ñu kunuu dava Xuva ko ntō. Kuan tsí koo é kā'án u ni ntō.

Tū'ún xuva kō vatā ó ntáka'an ña ñuú Coatzospan
 New Testament in Mixtec, Coatzospan (MX:miz:Mixtec, Coatzospan)
 copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 27 Sep 2019 from source files dated 19 Sep 2019
8f775598-56d9-56fd-966e-15e054d2f275